

10.000 Mucha na Krèsh

Tin un total di 17.000 mucha den e edat di 0 pa 4 aña na e sinku islanan di Antia, i 10.000 (59%) di nan ta bishitá krèsh òf skol di hunga, segun un relato skirbí resien pa señora drs. Angela Juliana-Dekker, kordinadora di e programa di SIFMA (sentro di informashon i formashon na bienestar di mucha na Antia).

Poko aña pasá, krèsh tabata un palabra kasi desconosí. Ma den korto tempu krèsh a bira un salbabida pa hopi hende. Hopi mama mester traha; i no tin otro rekursu. Kisas e mama no ta kasá, i fuera di su boluntat e mester a buska trabou pa su yunan por haña nan pan di kada día. E lo a deseá di keda kas i kria nan. Ma e no tabatin e opshon ei. Di bèrdat, e mama soltera tin un tarea enorme pa kria su yunan, tin bes sin yudansa di ningun otro pèrsona.

Ma tur e mayornan di 59% di e muchanan entre 0 pa 4 aña na nos islanan ta haña nan den un situashon ekonómiko asina pèrtá ku tur dos ta haña nan obligá di buska trabou i manda e yu krèsh òf skol di hunga? Sigur ku nò! Hopi pareha ta manda nan yu krèsh pasobra nan KE, no pasobra nan MESTER! E famia fásilmente por lora ku un salario so. Ma pasobra e pareha ke mantené un sierto nivel ekonómiko di bida, nan ta pone nan propio deseonan promé ku bienestar di e yunan. Of mamanan, kansá di e tantísimo atenshon ku nan yu ta eksigí, ta buska lugá pa manda e mucha. E yu ta mirá komo un estorbo indeseá.

Loke ta tristu ta ku awendia e egoísmo i materialismo aki ta aseptá komo normal den nos komunidad. E mentalidat a para bira ku e mama ta hiba e beibi for di hòspital pa krèsh ku solamente un parada kòrtiku na kas pa algun luna.

Mi tin un yu di tres aña. Ku gran frekuensia, ora hende ta mir'é durante oranan di skol, nan ta hasi'é e pregunta, "Bo no a bai skol awe?" komo sifuera ta piká ku un mucha di tres aña ta na kas ku su mama ainda.

E benefisionan di krèsh i skol di hunga ta propagá regularmente. Nos ta bisá ku esaki ta bon preparashon pa skol. "E yu ta siña kontá di 1 te 10 na hulandes, e sa kolónan, e sa diferente parti di su kurpa, i e lèter di alfabèt!

Ma hopi mayor por duna nan yu e mésun siñansa si nan lo inbertí e tempu! Ademas, ta muchu mas importante pa e yu ta prepará pa BIDA ku p'é ta prepará pa SKOL! Pa logra esei, ta hopi importante pa mayornan biba i kompartí nan balornan ku e yu, siñ'é loke ta bon i malu, siñ'é konosé Dios. Dios ta bisa bo kla tokante Beibel: "E palabranan aki, ku mi ta ordenábo awe, mester ta riba bo kurason; i BO MESTER SIÑA NAN KUDADOSAMENTE NA BO YUNAN, i mester papia di nan ora bo ta sinta den bo kas, ora bo ta kana riba kaminda, ora bo ta bai drumi i ora bo ta lanta" (Deuteronomio 6:6-7). Esaki ta tarea di MAYORNAN!

Estudionan di e efekto ku krèsh tin riba muchanan ta inkonklusivo. Loke si ta sigur ta ku ta hopi dudoso ku krèsh por yena e nesidatnan di e mucha riba un nivel igual ku e mayornan. Un ehèmpel di esaki ta e proseso sikológiko ku ta kuminsá poko dia despues di nasementu. E beibi ta kuminsá preferá su mama (òf esun ku ta kuido) riba tur otro adulto. E proseso aki ta eksigí tempu i konsistensia. Na un krèsh, e proseso aki ta interumpí, pasobra e beibi ta haña kuido di diferente hende. Ora un yu no ta logra mara un laso firme ku un adulto problema sikológiko i emoshonal por resultá.

Kontrario di opinion popular, un mucha ku ta bishitá krèsh no nesariamente ta mas sosial. Algun estudio ta indiká ku e por ta mas agresivo komo resultado

Ademas, maske kuantu diploma i amor un trahadó na krèsh por tin, tòg ta impusibel p'é duna kada beibi e kuido, amor, i atenshon individual ku e por haña serka su mayornan, debí ku e trahadó ta responsabel pa sikiera 10 beibi mas.

Yunan ta un bendishon di Dios: "..yunan ta erensia di SEÑOR; fruta di barika ta un rekompensa" (Salmo 127:3).

10.000 mucha na krèsh i skol di hunga sin duda ta un indikashon ku hopi mayor no ta tuma nan responsabilidad pa nan yunan na serio. Mayornan, bo yunan ta BO RESPONSABILIDAT...no di ningun otro hende. Si ta posibel, kria bo yunan bo mes. Maske kon bon e krèsh por ta, e no por remplasá e amor, kuido, kariño, i edukashon ku bo yu presioso tin mester di bo den e añanan tan importante di su bida. Tuma bo responsabilidad na serio!